

Ate't keyawow sasai mitoone iskwayach koospatoowe asookunewe tukooskāwinik unta neche ket ayanawow. Ke pewāyimowow Christ. Ke pukwatawow Christ, Ke pukwatānawow ayumehawin; Ke pukwatawowuk mawuch ka meywatise'twow ayiseyinewuk uske'k ka ayatwōw; mena mawuch ka itāye'tukik kitta ootootā-mimikooyāk, mena kespīn ke we' meytinowow kiche musinuhikun ke ka pekoopitānawow, mena tukooskātānawow sepa ke sitewak. O, keyawow oopewāye'tu-moowuk! wepuch ke ka ayanawow kotuk uskek. Keyipe michiyuwāsik, mena kwāskekapowestak Munetook ise. Ākwa, net otām, tanema tukooskāwinik unima ita ka nepoweyun?—achistowāyetumoowin. Anwātumoowin, apo pewāyetumoowin? Kunokiskise mechāt pukisinwuk nistum takooskāwinik o'che,—nipewuk ākose ise piko ā achistowāyetukik; pukisinwuk mākwach ā anwātukik; mena kotukuk iskwayach unta nepowewuk ā pewāyetukik pimachehewāwin. Mechātoo uskewina nowuch ākwa ispe ka ke achistowāyetukik piko, ākota o'che maka ke' anwātumwuk; peyis unoo'ch naspich pewāyetumwuk ayumehawin mena Christa. Pukwatumwuk ā mutwātineyik mutwāchichikun; pukwatumwuk kiche musinuhikun mena ootayumehaw; muchukitumwuk apo uske ita ka pimotāyu'k. Pāukwōw piko mena kitta tukooskatukik kitta o'che nisewunatise'tchik. O keyawow āka ā tapwātumāk ke wetumatinawow ā etukwuke pimatisewin mena nipoowin! tanema kā otinumāk? Ispe Pilate ka ke ooyusoowatat Jesusa, ke' itwāo, "Tanise kā totowuk?" Ayiseyinewuk maka tāpwāwuk, "Chastuhaskwas! Chestuhaskwas!" Ooskinekitik, ākose na ket itowow unoo'ch? Ket itwanawow che, Awusitā meyoachimoowin! Awusitā ayumehawin! Awusitā ket ayumehawinewow, ke kukāskimewāwinewow, mena ā meyootakwuk meyoachimoowin! Numoweya ne nutowāyimow Christ! Apo kā itwāyāk! "Tāyechikāyun Jesus, ke nutowāyimitin, ke kwetowe ayawitin, ke ka ayawitin!" Oh, pātus Muneto ākose kitta itāyetumoohituk unoo'ch ka tipiskak!